

28 MAY 1998

PM AKAN LAKUKAN LAWATAN KERJA KE JEPUN MINGGU DEPAN

Oleh: Michael Raj

KUALA LUMPUR, 28 Mei (Bernama) -- Perdana Menteri Datuk Seri Dr Mahathir Mohamad akan mengadakan satu lawatan kerja ke Jepun pada hari Isnin untuk berucap di dua persidangan utama mengenai ekonomi Asia Timur dan masa depan Asia.

Pada 2 Jun, beliau dijadual menyampaikan ucap utama di Tokyo pada simposium kelima Institut Hal Ehwal Kewangan Antarabangsa, yang merupakan ahli gabungan Tabung Kewangan Antarabangsa (IMF).

Dr Mahathir akan bercakap mengenai "Pemulihan Ekonomi Jepun dan Asia Timur."

Peserta-peserta yang akan menghadiri simposium ini terdiri daripada menteri-menteri dan pemimpin-pemimpin korporat terkemuka, termasuk Timbalan Pengarah Urusan IMF, Stanley Fischer.

Perdana Menteri juga dijangka menyampaikan ucapan pada persidangan Nikkei pada 4 Jun, yang bertemakan "Masadepan Asia." Perdana Menteri Jepun Ryutaro Hashimoto juga dijangka menghadiri persidangan itu.

Persidangan Nikkei diadakan setiap tahun sejak 1995 dan bertujuan memperdalamkan kefahaman antara Jepun dan negara-negara Asia yang lain.

Krisis kewangan dan ekonomi yang melanda rantau ini serta keadaan ekonomi Jepun yang membimbangkan dijangka menjadi agenda utama simposium IMF dan persidangan Nikkei.

Peserta-peserta akan membincangkan isu-isu di Asia dan berkongsi wawasan masa depan mereka, terutamanya pada ketika rantau ini bergelut dengan keadaan krisis ekonomi yang belum pernah terjadi seumpamanya sebelum ini.

Krisis ekonomi serantau tercetus Julai lalu berikutan serangan ke atas baht Thailand yang kemudiannya memberikan kesan menular ke atas matawang dan ekonomi lain, terutama matawang dan ekonomi Thailand, Indonesia, Filipina dan Malaysia.

Dr Mahathir akan kembali pada 5 Jun. -- BERNAMA

MR KY MA